

PAULO LIWAKATETIGI COLOSSEENSITEDI

Nigijo jotigide aca nigotaga Colossos iteloco nipodigi Ásia, analeegoyatigi me nipodigi Turquia niginoa nokododi. Paulo agica daga dalita nagajo nigotaga, otegeaagaga yowoogodi nigica lapo loiigi Cristo anidiaa ligeladi. Paulo idei niwilogonagaxi naga idí nagadi liwakate.

Paulo owidi ane iditeloco nagadi liwakate niginoa anijo magaga iditibige Efeesiotedi. Nigina me yotaganege Aneotedogoji, diniotagodetalo leegodi lewiga Colosseensitedi. Paulo eledi diigaxinagatece Goniotagodi Jesus me nigijaa lacilo loiigi, idiaagidi micataga daga lolaadi anowidi liwailidi. Paulo eo leemidi leegodi niigaxinaganegeco ane degewiteda. Yalagata nigijo oxiigodi anejinaga me godewiga, codaa eledi yalagata nigida gela anejinaga me godewiga leegodi me godexogotege Cristo. Paulo iladee wadonadi, eniododipi inaa nionigipi, niotagipi inaa otagododi, yelogoditigi anodaa leeditibige me ee lewiga leegodi monakato Goniotagodi.

Paulo yecoeditibige Colosseensitedi

1 ¹⁻²Ee Paulo, ee liigexegi Jesus Cristo, igaataga joanigidaa ane yemaa Aneotedogoji me ibakedi. Gonioxoa Timóteo ini meetaga naga jiwakateetibigajitiwaji notaganagaxi anakaami liomagataka Aneotedogoji, anakaami nigeladimigipitigi nigotaga Colossos, anakaami gonioxodipi ane gadexocitege Cristo, codaa anidioka limedi me iwitece liigaxinaganegeco.

Jipokagatalo Aneotedogoji iniaa Goniotagodi Jesus Cristo mowo aneletagadomitiwaji, codaa mowo gadaalegenali mele.

Paulo yotaganege Aneotedogoji codaa me diniotagodetalo

³Nigina me jotaganegenaga Aneotedogoji, jipokagatagalocotiwaji, codaa midioka limedi me iniotagodeegatalo ane Eliodi Goniotagodi Jesus Cristo, ⁴iniotagodeegatalo leegodi me jibodicagatibigajitiwaji anodaageni manakatonni Jesus Cristo, codaa anodaageni memaani inatawece loiigi Aneotedogoji. ⁵Jaganakatonni Jesus Cristo codaa adinemaanitiwaji leegodi manibeonitegetiwaji nigica lagajegitedagagi Aneotedogoji ane yotetetedagadomi digoida ditibigimedi. Jagajipaataatiwaji moditece nigica Aneotedogoji ane yotetetedagadomi nigijo nagajipaatalo niginoa notaga anewi, notaga anele anoditece Jesus Cristo.

⁶Niginoa notaga anele jigilaagiteloco inoatawece nipodaga codaa jogowo Aneotedogoji me nibinietediniwace oko inoatawece nipodaga, mijotaga me gadibinienitetiwaji nigijo noko maleekoka ajipaatalo lotaga anele, codaa ewi mowoogoti Aneotedogoji midioka limedi meote aneletogodomi. ⁷Epafras jigijaa ane gadiigaxinitecetiawaji nigina Aneotedogoji me dagaxa meletedogodomi. Codaa Epafras godokaagedi godemaanigi, ane yakadi me jinakatonaga, gobakawa moko liotagi Cristo, odae jigidaagee me gadaxawanitiwaji. ⁸Codaa jiginiaa Epafras natematitogowa nigica anodaagigotagawatiwaji Liwigo Aneotedogoji meo meliodi memaani eledi gonioxoadipi.

⁹Leegodi nigijo gobodigitibigagajitiwaji, odae nigijo naga jibodicaga, idiokaanaga limedi me jipokagatalo Aneotedogoji leegodi akaamitiwaji. Jipokagatalo Aneotedogoji meote me yajigotedagawatiwaji Liwigo gadixakedi codaa me yajigotedagawa gadowoogo aneotibige mepaanaga owoogoti nigica Aneotedogoji ane yemaa. ¹⁰Odae jigidaa nigakatitiwaji madiniwaxinaganagatiti mawii ane yemaa Aneotedogoji me eni, codaa mocaganitalo, codaa akati mawiite inoatawece anele, codaa mepaanaga owoogoti Aneotedogoji. ¹¹Codaa jipokagatalo Aneotedogoji me yajigotedagawatiwaji initawece loniciwaga ane nelegi, amaleegaga akatitiwaji me ixomagateenitedice inoatawece gadawikodico, codaa maniniitibecetiawaji. ¹²Eleditace jipokagatalo Aneotedogoji amaleegaga akatitiwaji maniotagodeetalo Aneotedogoji Godiodi, aneote me jakataga me jibagatege nigica ane yotetetema loiigi digoida ditibigimedi aneite inoatawece ane datale.

¹³Godogatedice mejonagateloco loniciwaga nexocaga, codaa eote Lionigi lemaanigi me iige godaalegenali. ¹⁴Iniaaginiwa Lionigi yeletedogodomi, codaa me godogatedice me idejonaga nexocaga. Codaa leegodi Cristo aneote, odae Aneotedogoji ja ixomagateetedice ijoatawece nigijoo gobeyacegeco.

Aniniwa icoa Jesus, codaa nigica baanegote

¹⁵Me jinataga Cristo micataga daga jinataga nigicoa Aneotedogoji ane digica ane yakadi me nadi. Liciagi nigicoa Aneotedogoji. Cristo jigijaa liidaga Lionigi Aneotedogoji. Iniaaginiwa nagaxatedeloco inoatawece ane loenataka Aneotedogoji. ¹⁶Leegodi Aneotedogoji ibake Cristo meote inoatawece aninoa, digoida ditibigimedi, codaa me digoina iigo, niginoa ane jakataga me jinataga, codaa me niginoa ane daga jakatagateda me jinataga. Jiginiaageote inoatawece niwicidi ane iige eletidi niwicidi, niginoa lacilodi niginoa niwicidi, codaa me niginoa niigenatagododi, inoa anida nagatetigi codaa anida loniciwaga. Cristo eote inoatawece ane niwicidi. Inoatawece eote eotedibige me iige. ¹⁷Akaaginiwa Cristo nigijo maleedigicoateda niginoa aninoa, codaa leegodi loniciwaga, odae jiginoa inoatawece ane loenataka codaa nigina noko oniditecibeci iteloco codaa ilagateloco aneyate. ¹⁸Loiigi Cristo liciagi nigina godolaadi. Odae Cristo jiginiaa lacilo ane iige nigidi nolaadi. Jiginiaaginiwa aneote me yewiga nigidi nolaadi, igaataga jiginiaaginiwa liidaga me Lionigi

Aneotedogoji, Nigijoa ane yeleo, pida Aneotedogoji ja yewikatiditace. Joanigidaa leegodi Cristo me gonegegi caticedi inoatawece aninoa. ¹⁹Igaataga Aneotedogoji, ane Eliodi Cristo, ninitedibece leegodi Cristo me licigi Aneotedogoji. ²⁰Odaa Aneotedogoji jegeote lowoogotetece miniaa ibake me nopilagaditace miniwataga inoatawece digawinitelogo ane jinataga codaa me oko, leegodi nigijo Cristo aneote. Leegodi Cristo me nadoogodi lawodi madataga nicenaganagate, Aneotedogoji ilakidetacediwage inoatawece ane jinataga digoida ditibigimedi, codaa niginoa ane jinataga digoina iigo.

²¹Nigijo jotigide akamagakaamitiwaji leegitalo Aneotedogoji motonitedice. Codaa akaami lakapetedipi leegotedi nigijoa gadowooko ane beyagi, codaa me nigijoa gadoenataka ane beyagi anawiite. ²²Pida nigina natigide, leegodi Lionigi Aneotedogoji meote me goneleegiwa, odaa ja yeleo, Aneotedogoji ja gadateogoteenitacetiwaji miniwataga, eotedibige me gadadeegitedicogitiwaji lodoe, makaami oko ane yapidi, anepaa iomagaditedice, me dagadiaagica laagedi. ²³Pida leeditibigetiwaji me idapaga diiticogi me iwagati liigaxinaganegeco niginoa nibodicetedi anele ane icogotigi miniwataga Aneotedogoji, codaa matitititiwaji me daga amigiticoace, codaa me daga ikanitiwaji manibeonitege nigicoa Aneotedogoji aneetedogowa nigijo naga niwakatee niginoa nibodicetedi anele anajipaatalotiwaji. Emegee Paulo, ja jao me ee niotagi me jatematitedibece nibodicetedi anele, baanaga oilaagagaditedeloco moyatematitedibece inatawece iigo.

Ica Paulo libakedi me yaxawa loiigi Cristo

²⁴Nigina natigide eliodi me idinitibeci me jawikode leegodi me gadaxawanitiwaji. Niginoa lawikodico yolaadi, leeditibige me jixomagateetedijo, nigepaagicotaa me ixomagatedice inoatawece yawikodico ane nikatedici Cristo me jixomagateetedijo. Jawikodetema loiigi Cristo ane micataga daga lolaadi. ²⁵Aneotedogoji eote me ee liotagi loiigi Cristo. Najigotediwa ibakedi me jao aneletagadomitiwaji. Ibakedi me jelogoditedibece inoatawece Aneotedogoji lotaga. ²⁶Niginoa ane dogoyowoogodi ijotawece oko nigijo jotigide, pida nigina natigide Aneotedogoji ja ikeetediogi nigina oko ane iomagaditedicoace me nepilidi. ²⁷Lowoogo Aneotedogoji me ikeetediogi loiigi nigica ane yemaa meote. Ikeetediogi nigica anodaagee me ibinie inoatawece ane latopaco noiika. Odaa ja ikee Cristo miniwa catiwedi godaalegena. Joanigidaa leegodi me inibeonagagee Aneotedogoji me godiwenigide anigida noko digoida ditibigimedi miniwataga. ²⁸Joanigidaa leegodi mejinagatece Cristo minataga inatawece oko. Jajoinaga codaa me jiigaxinaga inatawece oko, jibakenaga idatawece godixakedi, jaogatibige minatawece oko anoyexogotege Cristo agica gaantokaagica libeyacagajegi nigica noko nige jadeegaga lodoe Aneotedogoji. ²⁹Odaa joanigidaa leegodi me idinoniciwagaditeloco ibakedi, codaa joletibige me jibotege ane lakakegegi ibakedi. Odaa jakadi me jaote inoatawece ibaketedi leegodi yoniciwaga Cristo ane najigotediwa, eotedibige me jigodi ibakedi.

2 ¹Enice jemaa mowoogotitiwaji meliodi me idinoniciwagadi me gadaxawani, codaa me jaxawa gonioxoadipi ane nigeladimigipitigi nigotaga Laodicéia, codaa minatawece eledi gonioxoadipi ane digicata me etidadi. ²Jemaa mabo laalegena, codaa jemaa me ilagatiwage igaataga dinemaatiwage. Eleditace jemaa moyakadi moyowoogodi mida aneetege Aneotedogoji leegodi Cristo aneotetema, ajemaa daga nawienatakanaga, amaleegaga enegegi oyowoogodi Cristo, Nigijoa Aneotedogoji ane nikee. ³Cristo liciagi nigina nakabakenaganagadi ane yomoke epoagi, igaataga jiginiaa ikee nigicoa niliicagajetecidi Aneotedogoji, nigicoa ane digicoateda monadi nigina oko. Nigidiwa niliicagajetecidi idatawece nigica lixakedi Aneotedogoji, codaa me lowoogotakanegegi ane yajigote oko.

⁴Jao gadeemiditiwaji amanagawini agica ane gadinaaleni, aneetece niwitakeco, ibake niginoa notaga libinienaga. ⁵Igaataga idaagida me leegitibigajitiwaji, jeemitetece meite ee makaamitagatiwaji, eliodi me idinitibeci me jibodicetibigagaji me gadilakiitiwagetiwaji, idokidata aneni, codaa me atitetiniwace, idioka limedi manakatoni Cristo.

Anodaagee godewiga nigina me godilagatege Cristo

⁶Leegodi nigijo anodaagee mabaatege Jesus Cristo me Ganiotagodi, odaa oleetibige midioka limedi me gadexocitege. ⁷Macataga nagana enanigije me ili leegotedi litotitedi me ideite catinedi iigo, odaa oleetibige midapaga diiticogi me gadexocitege Cristo, amaleegaga gadiliiteloce gatiwagatakanegegi. Eledi gadiciagi nigina modabitegetini diimigi ditibigimedi lipodagaladi ane datiteti, joanigidaagele me enitiwaji me gadexocitege Cristo ane liciaceekawa nigina diimigi lipodagaladi, amaleegaga atitetitiwaji codaa midioka limedi manakatoni, anetigadiigaxinitece. Odaa idioka limedi maniotagodeetalo Aneotedogoji.

⁸Adinowetitiwaji adigica aneo makaami niogododi leegotedi liigaxinaganegeco ane degewiteda, nowooko ane digicata jaogate, ane ninaaletiniwace oko. Odiigaxinagatece inokinoateda epaa lakataga goneleegiwadi, lixaketedi goneleegiwadi, ane daga icogotedigi miniwataga Cristo. ⁹Igaataga Cristo liciagi Aneotedogoji, agica ane diniwokotetece, codaa nigijo malee yewiga digoina iigo me liciagi oko. ¹⁰Odaa nigida makaamitiwaji agica anopootibige catiwedi gadaalegenali codaa agica ane aniaditibige, leegodi me gadexocitege Cristo, ane lacilo inoatawece niwicidi ane niigenatakanaga, codaa minoatawece anida nagatetigi.

¹¹Leegodi me gadexocitege Cristo, odaa micataga dagakagiti gadolaadi mijotaga ane lakatigi jotigide loiigi Aneotedogoji. Pida nigina natigide agalee goneleegiwadi anoyakagidi gadolaadi, pida nigina natigide Cristo бага yakagidi nigica ane beyagi catiwedi gadaalegenali. Odaa jigidaa meote me gadiwokoni loniciwaga ane beyagi ane ide i catiwedi gadaalegenali. ¹²Odaa idaagee nigijo nagadinilegenitiwaji, liciagi degetigadalicitiniwace, degetigadawanagatitege Cristo, odaa nigidiaagidi ja gadewikitacetiwaji nigijo naga yewigatace Cristo, leegodi me iwagati Aneotedogoji meliodi loniciwaga, codaa me iwagati me yewikatiditace Jesus.

¹³Nigijo jotigide akaami émagaga lodoe Aneotedogoji leegotedi gabeyacegeco, codaa leegodi me digicata anenitege loiigi Aneotedogoji, anidiwa liigenatakanegeco miditaga. Pida Aneotedogoji eote Cristo me yewigatace, codaa makaamitiwaji. Codaa ixomagateetedice nigijoa gabeyacegeco. ¹⁴Micataga digidiwa gonaalewe miniwataga Aneotedogoji, jinaaleweega leegotedi gobeyacegeco. Pida Aneotedogoji ja yedia nigijoa gonaalewe, oada agaleegica gonaalewetalo, leegodi Cristo ja yedia gonaalewe nigijo me yeletedeloco nicenaganagate. ¹⁵Nigijo naga yeletedeloco nicenaganagate, Cristo ja igeke nigijoa ane niigenatakanaga, codaa nigijo anida nagatetigi (goneleegiwadi codaa me niwicidi abeyacagaga). Cristo noga loniciwaga, codaa ikeetediogi inatawece me nigijaa anigaanyegegi.

¹⁶Enice jinaga domaga atacolitece nigina anodi minoa eletidi goniigenatakanegeco ane leeditibige mejiwagatece. Owote niigenatakanegeco midi ica ane dagakati melici, macipeta, codaa minoa nokododi ane limedi nalokeco, codaa epenai gela, codaa modi minoa nokododi me inipenagatini. ¹⁷Nigijoa niigenatakanegeco liciagi nigina liwa oko ane jowoogotaga mina menagi. Pida nigini oko nigini mejinataga, oada agica ane jaoga daga jjiwinagata liwa. Cristo jigijoa menagi, oada agalee leeditibige daga jotetenaga nigijoa nakataga laxokodi ane liciagi niginoa wa. ¹⁸Jinigica mawiitetiawaji nigina aneetagawatiwaji mabataa, leegodi me daga iwitece liigaxinaganegegi, igaataga diniwikodetibece inokina me lodoe oko, codaa dogetetiogi aanjotedi. Codaa nigini oko mee Aneotedogoji mepoka ikeeteta nigijo oko nigica ane leeditibige me jaoga. Anagaxakenegegi, pida agica jibagata, codaa lowooko liciaco lowooko nigina oko anida aneetege nigina iigo. ¹⁹Nigini oko agaleegica daga yexogotege Cristo ane godacilo. Cristo eote inatawece lolaadi, ane loiigi, me idapaga diiticogi me ili ane yemaa Aneotedogoji me liciagi. Oada idatawece godilagatiwage leegodi loniciwaga Cristo, micataga godolaadi mowidi lagaagetedi, pida oniditeci, leegotedi godiniocidi inaaginoa godomolokenali.

Godeleo pida ja godewigatace miniwataga Cristo

²⁰Nigida makaamitiwaji micataga daga gademagawa Cristo. Oada agaleegica anenitege liigenatakanegeco, codaa me niginoa lakataga nigina oko. Enige, igaamee ina me gadiciagi nigina oko ane beyagi lakataga digoina iigo? Igaameetiawaji ina me iwitece icoa lajoinaganegeco nigina oko? ²¹Igaataga modi, “Jinagabaata nigidi!”, migetaga ina modi, “Jinegelici nigida niweenigi!”, “Jinigitinegeni nigidi!” ²²Nigida nakatigi inoka eetece nigina anicota me ma, micataga nigina niweenigi. Enice jinaga iwitece niginoa nakataga otegeaxagaga niigenatakanegeco ane icogotedigi minoataga niginoa goneleegiwadi. ²³Ewi niginoa nakataga me latopiwatigi daga gonegaga, igaataga odiigenataka anodaagee me jogeegatalo Aneotedogoji, pida odogetetiogi aanjotedi, codaa odiigaxinagatece anodaagee me idiniwikodenagatibece, pida onowo me diniwikodetibigiwaji, codaa goniigetogowa me jiloikatitaga niginoa godoolatedi.

Pida nigidiwa nakataga agetigodaxawa me jakataga me jajacagataga nagani godaalegena anabeyacege ane yemaatibece meo ane beyagi.

3 ¹Leegodi Aneotedogoji me yewikatititace Cristo, odaa jigidaagee micataga Aneotedogoji daga gadewikatititacetiawaji gadawanagatitetege Cristo. Odaa ele midioka limedi moleetibigetiwaji nigica ane idei ditibigimedi, aneite Cristo moiwenigide, nicote liwai libaagadi Eliodi. ²Idioka limedi mowoo codaa memaanitibige nigica ane idei ditibigimedi, idigida jinegemaanitibige niginoa aninoa nigina iigo. ³Igaataga micataga daantaga gadelewitiawaji (odaa agaleegica anenitege nigijo jotigide anenitiawaji), pida ja gadewikitiawaji awanitege Cristo me yewiga. Pida Aneotedogoji anaga ikee nigica gela gadewigatiawaji. ⁴Leegodi Cristo naga yewigatace, odaa nige dinikeetace, oko eledi, Aneotedogoji eote me godelogo codaa godiwenigide godawanagaditetege Cristo.

Nigijo jotigide anejinaga me godewiga icaagica gela godewiga

⁵Jinagawii ane beyagi ane yemaa gadaalegenali, pida awii micataga nigina oko baanaga yeleo agalee yakadi meo ane beyagi. Enice jinaga gadoomatewa ane daga gadodawa. Jinaga domaga emaanitibige nigina ane napiro, jinagawii, otegeaagaga owoo nigina ane napiro ane ilidagaditigi gadoolatedi. Jinegemaanitibige midioka limedi meliodi nigina anakati, igaataga nigidaageni ja dagaxa mawenigideni nigica anakamaga emaani, odaa agalee ogeetetalo Aneotedogoji. ⁶Jinagawiiawaji niginoa ane beyagi, igaataga Aneotedogoji yelatetema codaa eliodi me iloikatidi nigina oko ane degeyiawagaditeda. ⁷Nigijo jotigide akamagakaamitiawaji jagawiite niginoa ane beyagi, codaa inoka awiite niginoa ane beyagi gadaalegenali ane yemaa.

⁸Pida nigina natigide ele mikani mawiite niginoa ane beyagi, jinaga eligidee, codaa jinogoteteni gadelaga catiwedi gadaalegenali, codaa jinagawii ane beyagitema eledi oko. Jinagabeyacagati gagegi motagani, codaa jinegeni inoa notaga ane napiro. ⁹Codaa jinagadininaalenitiawaji, igaataga jigikani nigijo jotigide aneni codaa jigikani nigijoo gadakataga laxokodi. ¹⁰Nigida makaamitiawaji jigida gela aneni Aneotedogoji ane yajigotedagawa, anidioka limedi me ili, eote micota me gadiciagi, digo miniwataga, codaa eote mepaanaga owoogoti Aneotedogoji. ¹¹Joanigidaa leegodi me dagalee ibeyacagadi nigina oko mige judeu, ogoa domige ajudeu; domige yakagidi lolaadi, ogoa domige ayakagidi lolaadi; migetaga iomigigi; domige nialigipijegi; domige niotagi, ogoa domige aniotagi. Pida okotawece iniokiniwateda Cristo mida ane jaogate, codaa ina me yewiga catiwedi gadaalegenali.

¹²Aneotedogoji gadiolaatedicetiawaji, gadiomagatitedice makaami loiigi, codaa me gademaani. Enice adiniwikodenitiawaji, oleetibige makaami eletema eledi oko, adiniwikodenitibece lodoe eledi oko, codaa ocaganegeni eledi oko, codaa adinatiitalo niginoa anicinoa. ¹³Adinatiita eledi oko. Nigicatibece ina gadileenigitema eledi oko, dioki ixomagateenitice anowotagadomi ane beyagi. Mijoataga Cristo me ixomagateetedice gadoenataka ane beyagi, awii

digo mijoataga anee. ¹⁴Odaa ane dagaxa me leeditibige madinemaanitiwaji, amaleegaga gadilakiitiwage, codaa me gadegenakitiwaji.

¹⁵Jemaa Aneotedogoji midioka limedi meote mele gadaalegenali, amanagawini owoogotitiwaji mawii nigica anewi. Igaataga gadixipenedicoace eote makaami lapo oko ane ilagatiwage, codaa eotedibige mele gadaalegenali. Codaa midioka limedi maniotagodeetalo.

¹⁶Oleetibige mele mowookonitiwaji codaa midioka limedi me nalagatibigagaji nigijoa niigaxinaganegeco anoyalagatalo Cristo, codaa mele me iigaxinagani, codaa nigina me aladeeni eledi oko, abakeni initawece gadixakedi ane yajigotedagawa Aneotedogoji. Codaa agaani Enaco ane diniditologo lotaganagaxi Aneotedogoji, codaa eletidi Enaco, codaa agaani nogeegeco ane gadiigaxinitece Aneotedogoji Liwigo. Agaagananitibigimece Goniotagodi, codaa oleetibige midioka limedi maniotagodeetalo manitawece gadaalegena.

¹⁷Enice okanicodaagicoateda ane gadotaga, codaa mokanicodaagica anawii, oleetibige manelegateeni Liboonagadi Goniotagodi Jesus. Codaa nigina maniotagodeetalo Aneotedogoji, Godiodi, abakeni Liboonagadi Jesus.

**Anodaa leeditibige me eni madiniwaxinaganagatiti
lodoe eledi oko leegodi naga gela gadewiga**

¹⁸Akaamitiwaji, iwaalepodi, iwagati gadodawadi, igaataga jigidaa leeditibige me eni leegodi me gadexocitege Goniotagodi. ¹⁹Akaamitiwaji, goneleegiwadi, emaani niginoa gadodawadi, codaa jinagakaami aojokomatadipi.

²⁰Akaamitiwaji anakaami nionigipi, oleetibige midioka limedi me iwagati gadiododipi, igaataga Goniotagodi jigidaa yemaa me eni, akaamitiwaji ane iwagati Goniotagodi. ²¹Akaamitiwaji anakaami eniododipi, jinagawii gadionigipi me neligideega leegodi anemiitigi moxoki, adagawiitibige midioka limedi magecagalodipi.

²²Akaamitiwaji anakaami niotagipi, ele midioka limedi me iwagati ane ganiotagodi digoina iigo. Odaa jinaga iwagati inokina nigina mida me gadiwini dogoleetibige mocaganita, ane lakatigi nigina oko anida aneetege nigina iigo. Pida oleetibige me iwagati ganiotagododipi inoatawece anoiigetedagawa, mele gadaalegena, leegodi me eemiteetigilo Aneotedogoji.

²³Nigina mawiiwaji okanicodaagica nibakedi, adinoniciwagati mawii nibakedi anele, micataga daga Goniotagodi iigetedagawa mawii nigida nibakedi, jinigidoka ixomitiwece gadacilo meledi goneleegiwa gadiigeni mawii. ²⁴Igaataga owoogotitiwaji Goniotagodi micota me yajigotedagawa nigica lagajegitedagatiwaji digoida ditibigimedi. Igaataga Cristo jiginiiaa ane Goniotagodi ane jibaagatema. ²⁵Odaa nigina anidioka limedi meo ane beyagi aibeyacagadi anini nigini oko, pida Aneotedogoji yajigote loojedi ane igenaga leegodi nigina ane beyagi aneo. Igaataga Aneotedogoji idokidata anigotediogi nigina oko micataga dogoko diniciamico. Agica ini aneote me iomigigi idatawece godiaceeketediwage nigina me leeditibige me godiloikatidi.

4 ¹Akaamitiwaji aninoa gaotaka, adowetitelogo gaotaka, ajicitiogi nigica ane igenaga modibatege. Analakitibige magaga iniwa Ganiotagodi digoida ditibigimedi.

Paulo ladeenaganegeco

²Oleetibige midioka limedi motaganegeni Aneotedogoji, jinigikani motaganegeni. Atacolitiwaji nigina motaganegeni Aneotedogoji amaleegaga owoogoti nige yajigotedagawa anipokitalo, odaa aniotagodeetalo. ³Codaa ipokitalo Aneotedogoji me jakataga mejinagatece Cristo, codaa me jikeenaga anewi anodaageeteda Cristo. Ite ee niwilogonagaxi leegodi mejitece Cristo. ⁴Codaa leeditibige mejitece Cristo amaleegaga eliodi oko oyowoogodi. Codaa ipokitalo Aneotedogoji minatawece igenaga moyowoogodi yotaga nigina mejitece Cristo.

⁵Abakeni gadixakedi nigina midatecibece madinadeegitege nigina oko analeedogoyiwagaditeda Goniotagodi. Nigina midatecibece makati maxawani, odaa ikeenitiogi mida anenitege Cristo. ⁶Abakeni gadixaketedi amaleegaga idioka limedi mele motagani, enitece notaga anida ane jaogate, amaleegaga owoogoti ane alitigi gagegi magiti okanicodaagica oko.

Owidijedi lotaga Paulo me yecoaditibige Colosseensitedi

⁷Jiige Tíquico migo yatematitagawatiwaji inoatawece ane jixomagateetedice. Tíquico gonioxoa aneliodi me jemaanaga, codaa eledi liotagi Goniotagodi anidioka limedi meo ane iigete Goniotagodi, codaa midioka limedi me godaxawatece libaketedi Goniotagodi. ⁸Jimonya migo makaamitagatiwaji, jaotibige mica ibodigitibigagajitiwaji, codaa jaotibige me gadaxawanitiwaji me ili gatiwagatakanegegitema Goniotagodi. ⁹Gonioxoa Onésimo jiige me lixigagawa Tíquico. Onésimo gonioxoa aneliodi me jemaanaga, codaa me jakataga me jinakatonaga. Eledi ida anenitegetiwaji. Nigidi iniwata gonioxoadipi oyatematitagawa anodaageeta digoina anejo.

¹⁰Gonioxoa Aristarco anini meetaga digoina niwilogonagaxi, yecoaditibigagajitiwaji, codaa gonioxoa Marcos eledi yecoaditibigagajitiwaji. Marcos letexegi Barnabé. Jagabaatege yajoinaganegegi ane jidi mele mabaatege Marcos, nigicotagawatiwaji. ¹¹Josué, aneledi liboonagadi me Justo, eledi yecoaditibigagajitiwaji. Nigidiwa iniwatadigini goneleegiwadi anoyiwagadi Goniotagodi, nigidi jigidiokidi me judeutedi ane ibakawepodi. Eliodi metidaxawatece ibakedi, mejitece Aneotedogoji me yemaa me iige laalegenali oko.

¹²Gonioxoa Epafros yecoaditibigagajitiwaji. Epafros elatibige ganigotaga, inaagina liotagi Jesus Cristo, codaa midioka limedi me dinoniciwagadi me yotaganegge Aneotedogoji leegodi akaamitiwaji. Dipokotalo Aneotedogoji matiteteloco gatiwagatakanegegi, codaa mele mowoogotitiwaji niigaxinaganegeco aneetece Goniotagodi, codaa dipokotalo midioka limedi mowoogoti codaa mawiite inoatawece ane iigetedagawatiwaji

Aneotedogoji. ¹³Emegee jinadi codaa jakadi meji Epafras meliodi me diba me gadaxawanitiwaji, codaa me yaxawa gonioxoadipi ane nigeladimigipitigi nigotadi Laodicéia aniaa Hierápolis. ¹⁴Gonioxoa Lucas, dotowegi aneliodi me jemaanaga, iniaa Demas eledi oyecoaditibigagaji.

¹⁵Adecoateenitece nigina anoyiwagadi Goniotagodi ane nigeladimigipitigi nigotaga Laodicéia, codaa adecoateenitece gonioxoa Nínfas, codaa me nigica lapo anoyiwagadi Cristo ane dinatecogotee ligeladi Nínfas. ¹⁶Nigagoti malomegeniteloco nagadi iwakate, odaa iwakateeniticogi nagadi yotaganagaxi miditaga lapo anoyiwagadi Goniotagodi digoida nigotaga Laodicéia, codaa mawii magaga oyalomegeteloco nagadi iwakate. Codaa aagaga alomegeniteloco notaganagaxi ane icogotigi Laodicéia. ¹⁷Enita gonioxoa Arquipo, “Digawini! Oleetibige magoti gabakedi anabaatege, leegodi mida anenitege Goniotagodi!”

¹⁸Ee Paulo, emegee jidi iboonagadi me idecoaditibigagajitiwaji. Jinaga gadaagititiwaji me ee niwilogojegi. Jemaa Aneotedogoji midioka limedi meletedagadomitiwaji. Odaa jigidaagee. (Amém).